

國史館 輯

清代傳記叢書



明文書局印行

清代傳記叢刊・名人類
周駿富輯 ⑱

忠義紀聞錄

(二)

三十卷

(清)

陳繼聰撰



明文書局印行

11/10/17

忠義紀聞錄卷第二十一

鎮海陳繼聰駿孫述

朱侍御琦

朱公琦字伯韓廣西臨桂人父某字韞山官河南濬縣知縣李文成亂誓死守城有功卒祀名宦公幼負雋才喜治古文詞偕其友龍翰臣王定甫皆以永福呂月澹大令爲師法而私淑惜抱姚郎中名譽日起道光十一年舉鄉試第一十五年成進士選庶吉士授編修都下爲才人淵藪公故工於詞章至是從梅伯言戶部邵位西刑部諸人遊上下其議論文愈淵懿樸茂有桐城典型而駿駿乎入其室時湯郎中鵬最負氣傲岸獨心折公許可甚至曾文正

公方官翰林題公詩亦有古人已矣吾猶及見此才之歎
其爲名賢所賞識如此旋充史館纂修作新饒歌樂府序
云臣聞天下雖安忘戰必危進不忘規近臣之義伏惟我
朝肇造之初八校分屯兵力最强 太祖受命一成一
旅奄有五部 太宗繼之招徠屬國東自朝鮮迄西北海
世祖申命遂定中原統壹天下 聖祖重光削平三藩
世宗底定青海 高宗蕩夷藩戎及大小金川拓疆二
萬里 仁宗之世逆匪震驚旋以乂安 列聖偉烈神謨
具在寶錄謹述其畧被之聲謠凡四十章命曰新饒歌臣
琦謹撰蓋其時泰西款約已成朝野樂於晏安戎備益弛
公故追仰武烈作爲詩歌獻之 天子欲以警動內外俾


百爾臣工知承平不可久恃也尋改監察御史章數上皆天下大計臺中號爲敢言已而以疾告歸慕其鄉先達陳文恭公之爲人思以德業勵當世益銳志嚮學會嶺右羣盜起當事延公督治團練適張家祥投誠於左江鎮官吏多疑之者公獨識其人忠果可任言於署廵撫周文忠公力保其無他後更名國樑卒爲名將死事久之公以勞績議叙道員入京候選時何子貞編修宗滌樓侍御王少鶴戶部孔繡山葉潤臣兩舍人皆在都下相與觴飲顧祠顧祠在京城西慈仁寺卽公昔年官翰林與何編修創建以祀亭林先生者也復同諸人拜歐陽文忠黃文節王伯厚諸賢生日分韻賦詩極琴樽吟讌之歡踰年不得選補乃

出都門過濟南遍探珍珠龍灣之勝尋南遊隨大學士桂
文端至江蘇終落落無所遇未幾鍾山大營潰蘇常瓦解
豺虎縱橫道途多梗公漂泊三吳悲憤不得意值王壯愍
爲浙撫雅重公名招入幕府尋以團練屬之壯愍方因乏
餉政多權宜而公發論每持大體務卹民隱不肯與言利
者苟且競進或有嫌其迂濶夷然自若也賊旣圍城公守
清波門督士卒守禦無間晝夜食將盡壯愍以米餉猶分
數斗貽其友伊樂堯樂堯杭之宿儒與公爲道義交城陷
公死之時咸豐十一年十一月也事聞 賜卹如例公著
有怡志堂稿

浙江忠義錄參怡志堂稿曾
文正詩集東洲草堂詩鈔

論曰伯韓先生湛深經術以文章名天下然實有經世之

志於武備吏治嘗侃切言之惜乎不得大用見之於建樹也迨後鄉國變起遂至栖栖道路卒就幕府未免因失所宗然而營連之處圍城初無求於平原況夫見危授命大節錚錚足爲儒臣光哉



060-008

徐觀察榮

徐公榮字鐵生漢軍正黃旗人先世駐防廣州公生有異質幼而能文年十五補諸生旋以舉人大挑爲藁城訓導中道光十六年進士試令浙江歷宰遂昌嘉興臨安諸縣俱以清廉著聲嘗奉檄撫卹奉化難民所過拒絕饋送一日途中絕糧僕從皆愠公獨晏然自如賦餓鄉詩以見志撫軍劉公韻珂甚器重之適值海疆軍務已竣會城設報銷局撫軍委公任其事嚴浮冒杜侵漁綜核精當不染錙銖遷玉環同知升紹興知府辦理水災散粟賑饑民咸德之調守杭州奸徒希圖搶掠每宵縱火城外又多盜斫蔭木皆捕而懲治之其患乃除復嚴行保甲法巷限以柵守

以邏卒夜必躬巡不辭勞瘁咸豐三年署杭嘉湖道於潛
趙四喜兄弟聚黨屯天目山謀據縣城作亂公督兵勇掩
之搗其巢於昭明寺擒斬兇悍百餘人餘黨悉平會粵賊
自江西竄擾浙境大府命公籌辦防堵事宜公乃增設常
山開化之戍以及貴溪弋陽等處亦相要害而布置之賊
見守嚴引去四年祁門失守公以皖南新轄浙江天子
亦有保徽卽以保浙之旨方抱疾臥聞警請行率兵馳至
嚴州復往徽郡親歷各嶺扼險防守勸諭紳耆勤加團練
連次殺賊同諸大將收復東流建德二縣五年二月賊又
驅衆大至土寇望風迎導攻陷黟縣公急檄催他將進兵
自率新軍屯營漁亭遇賊禦之中矛被害年六十四同死

者都司許上達知事張穎賓等數人公子慮善奪公尸以
歸時 朝廷適有福建汀漳龍道之 命而公已先歿矣
妾伍氏在省城聞訃亦投繯死公狀貌清癯生平最嚴義
利之辨恒以行無悔事讀有用書二語自勸晚尤服膺先
儒呂新吾劉念臺之書律已嚴而待人必恕士有片長獎
許惟恐不至著有戴禮補注日新要錄懷古田舍詩集
撰述甚富其志節尤錚錚自矢爲杭守時浙河多警嘗命
鑿井於署語家人曰此卽古人止水亭也一旦有變吾當
以此爲葬骨處卒踐其言剿賊而死 天子深爲軫惜以
正三品賜卹世襲騎都尉崇祀浙江名宦祠伍氏亦以貞
烈蒙旌

謝蘭生撰傳參懷古
田舍集復莊文權

論曰公自爲諸生肄業粵秀書院舉爲學海堂齋長已盛

有才譽工詩精隸書善畫梅

案思忠錄公有梅統十卷

時人以三絕推

之作令放衙輒喜吟詠太傅阮文達公嘗呼爲詩縣令其
宦浙二十載清而惠持躬無過失終以馳驅王事慷慨殉
難蓋文章經濟道德氣節公實兼而有之也

鄧太僕爾晉

鄧君爾晉字子楚江甯人嶰筠尙書之第四子也生有工性四歲遭生母喪哀毀如成人旣長高材好學能文工書法尤以淹博知名著有黎垣紀畧諸書道光二十九年充拔貢生江督陸公立夫重其才延入幕中爲記室咸豐三年官兵潰於九江君說江督急守安慶不聽君遂辭去旣而皖城淪沒金陵亦陷君以仲兄爾頤宦晉乃往依之四年賊竄山西君兄適知絳州助之守禦嘗出視險隘歸未至城數里見一人戴笠指而呼曰賊薄城矣不可入從騎皆驚君曰此詐也手揭其笠髮長數寸窮詰之得爲賊間諜狀盡捕之賊不敢至城以完旋以通判投効江南大營

歷參向忠武張忠武軍敘功擢知府九年江甯將合圍諸將咸謂滅賊在旦夕君知督師某公與張忠武意見互異獨憂之曰今大帥不和此師其殆哉十年春大營潰君方在鎮江浦口諸路購軍米聞警兼程赴或尼之君慨然曰事誠不可爲顧張總統尙守丹陽兵以食爲本萬一有濟吾盡吾分耳未數日丹陽軍又大敗總統戰歿時君次子嘉緒隨侍在營中以馬奉君勸之出走君以馬策撾其首曰吾素志殉國汝歸侍汝母撫諸弟成立汝之孝也嘉緒曰避父之難而逃其死去將安之君策馬冒陣死嘉緒從焉事聞贈太僕寺卿建專祠賞雲騎尉世職

上江縣志

論曰子楚太僕以文士而具經濟才殆得於庭訓乎其參

張忠武軍而料此師之殆尤爲有識卒赴忠武之難冒刃
而前父子併命不願逃生爲忠臣爲孝子亦青史之美談
足爲邦家光也

